

四庫全書

史部

欽定四庫全書

聖祖仁皇帝親征平定朔漠方略卷五

九月庚午朔

命派京師大兵及大同宣府等兵備噶爾丹時折卜
尊丹巴庫圖克圖遣使報稱噶爾丹分兵三路
沿途劫掠約會於我邊哨愛必汗喀喇鄂博之
地侍郎溫達以

聞

上諭尚書阿爾尼等曰喀爾喀所告之言雖未審虛實而我邊塞不可不為之防禦應派京師八旗護軍每佐領七名驍騎每佐領二名前鋒二百名火器營兵一千子母礮八門限五日內起程再令大同宣府總兵官鮑敬藍理各選精兵一千親率而來我軍俱應在歸化城駐備其令議政王貝勒大臣議之議曰邊疆事關重大應遵

上諭而行此所派京師大兵每翼應派都統二員副都

統四員前鋒叅領一員侍衛一員每旗護軍叅
領二員驍騎叅領各一員又總統火器營之都
統以及前鋒統領現在隨

駕應請

皇上簡用此所派大兵令何人總統督率而來應用何
項將軍印伏候

睿裁議入

諭曰此係備兵不必用將軍印每翼置都統一員右

翼著公蘇努率之左翼著公華善率之即以蘇努
為統帥左翼著副都統邁圖納泰查木揚楊代來
右翼著副都統希禪阿爾法牛鈕達爾泰來

壬申

命都統公諾敏彭春等赴安親王岳樂軍前京師及
各路大兵暫停起行

上諭兵部曰前者侍郎溫達奏言噶爾丹分兵三路追
土謝圖汗將近我喀倫朕以邊疆事關重大故頒

諭旨派京師大兵以備之今聞噶爾丹於我朝所遣使臣待之有加禮殊為恭順且又聞其遣使與我阿齊圖拜里等偕來請安應將京城大兵暫且停其起程仍令各為預備候旨大同宣府總兵官之兵亦暫停起行令其候旨行在所有之兵每佐領派護軍二名前鋒派二百名火器營兵全派令赴安親王軍前其存留官兵檢選肥壯馬匹給發前去之兵將青城運來之米計口授之此去之兵

著都統諾敏彭春護軍統領托倫揮蘭副都統康喀拉尚圖酌量派發章京統率前往

丁丑土謝圖汗折卜尊丹巴庫圖克圖率所屬請降先是巴林烏朱穆秦蒿齊忒克西克騰科爾沁阿霸哈納爾蘇尼特阿霸坡扎魯特歸化城土默特之各旗蒙古王台吉等節次奏報喀爾喀額爾克吳巴什顧魯帶青額爾德尼阿海慙都台吉額爾克伊爾登達爾漢台吉車卜登

台吉伊達木扎卜台吉達賴台吉賓他海台吉
丹津台吉達爾漢台吉色卜騰台吉帶青台吉
額爾克綽克圖台吉沙克都爾台吉米梯克額
爾克帶青台吉班第帶青親達摩尼帶青台吉
巴忒馬巴圖爾台吉勞章巴圖爾台吉他爾占
達爾漢台吉龔格台吉阿南達台吉吳巴第台
吉朝罕台吉拉卜灘台吉車林達什台吉音扎
納台吉折卜尊丹巴弟子西拉卜達什喇嘛又

墨爾根帶青伊爾登卓力克圖台吉扎卜青台
吉等為首各率屬下人衆奔入喀倫請降陸續
具報

上遣官往

諭准令來降之喀爾喀在喀倫以內遊牧不許妄行
盜竊仍嚴飭內地蒙古各禁止屬下不許侵凌
盜竊至是土謝圖汗率其弟西地西里巴圖魯
台吉等奏言謹奏

皇帝睿覽諸凡情事曾兩次遣人入奏俱蒙

俞旨鑒納不勝懼忭謹率自古以來歷世所轄左翼
及相附之右翼諾顏等同請歸依

皇上下履伏乞大沛

鴻恩勸救臣等朔日吉旦遣奏又設站侍郎溫達報
曰折卜尊丹巴庫圖克圖遣使來告曰向蒙

皇上鴻恩勵以勤修功德欽遵

諭旨禮誦靡懈不意厄魯持來焚燬廟宇棄擲經典

今未知再能仰副

皇上聖旨否久欲入覲

天朝自念生於荒徼言詞粗陋恐不能奏對是以不
果我諸弟子衆多願依

皇上神聖太平之治以副夙望仰乞

聖恩俯恤賜以水草善地且望重建前廟又左右兩翼
諸台吉皆奉我為師言庫圖克圖欲入則我等
願從又沿喀倫一帶阿霸哈納爾諸台吉亦欲

從入因謂之曰我荷

皇恩深重我意已確然不移汝等果欲誠心歸附各隨
汝等之意我不便為汝等代奏也理藩院據報
以

聞

旨下議政王貝勒大臣集議議曰厄魯特喀爾喀向
來歸化職貢有年今交惡相攻喀爾喀國破土
謝圖汗折卜尊丹巴庫圖克圖等仰瞻

皇上萬邦一體同在覆育誠心請降應受而養之為之
安插俾其得所即令尚書阿爾尼前往喀倫面
見折卜尊丹巴庫圖克圖土謝圖汗等備宣

諭旨覆奏之日再請

上裁得

旨如所議阿爾尼瀕行

上諭之曰喀爾喀等雜處我邊汎內外應嚴禁屬下不
許劫奪盜竊為亂如有違犯照內地律例正法至

放火小偷亦照我例從重治罪其令喀爾喀該管屬下嚴加曉諭

甲申學士拜里等攜噶爾丹疏歸覆

命拜里阿齊圖等奉使至噶爾丹所噶爾丹遇之殊為恭順以入邊貿易事託阿齊圖等奏言頃奉

明旨限貿易人毋得過二百名我兄弟台吉等不知其故以為出自我意不容彼貿易皆與我不和乞為代奏照常進貢貿易并遣使根敦哈什哈

等與阿齊圖偕來請

安入貢疏曰頃接到使臣賚來

勅諭禮物不勝懽懽喀爾喀土謝圖汗折卜尊丹巴

兩人違違賴喇嘛之言降斥西勒圖坐位又違

旨侵擾我四厄魯特橫行如此實係恣肆無道之人

也彼既悖道蔑法而行則我之理直矣倘欲

勅諭大衆歸於蕩平和好此地亦當竭力圖之罔識

忌諱特疏陳奏別有所言敬煩兩使代請奏至

旨下議政王貝勒大臣集議議曰噶爾丹向我使拜
里阿齊圖等自陳理直訴其始終誠心敬

上之意又虔恭貢獻請准諸台吉貿易即應遣使往

諭但目今喀爾喀俱各敗奔入我喀倫

皇上詳諭尚書阿爾尼遣使往議安插俾令得所應俟
阿爾尼前往喀倫查明後噶爾丹作何遣使賫
勅往諭之處另行奏請議入

上是之

十月庚子朔

諭撤安親王岳樂軍

上諭內大臣國舅佟國維等曰安親王軍及諾敏彭春等所率之軍今漸寒冷馬或疲瘦且軍士乘暑而往恐冬衣未備應將是軍撤回又侍衛阿南達去日已久馬匹糗糧或至窘乏尚書阿爾尼侍郎溫達等俱在喀倫其令阿爾尼等作速酌量備辦馬匹糗糧往迎阿南達毋致遲悞

乙巳

命尚書阿爾尼等安插來降喀爾喀阿爾尼奏言臣

等於九月二十九日至喀爾喀問土謝圖汗折

卜尊丹巴曰汝等入喀倫而居之意何也今又

將何往告曰我等為厄魯特所敗奔進喀倫永

歸

聖主乞救餘生作何安插一惟

上裁又曰我等敗遁盡棄部落牲畜而來雖少有所攜

難以自存伏祈

聖上俯賜宏恩臣等遂令土謝圖汗折卜尊丹巴等將
彼從降台吉等名字及喇嘛班第部落人口數
目查送計開現在偕來台吉三十餘人喇嘛班
第六百餘人戶二千人口二萬在後未到者尚
多俟到時另將數目開送

上命議政王貝勒大臣集議議曰土謝圖汗折卜尊丹
巴等累世恭順職貢有年今為厄魯特所敗其

國殘破素仰

天朝覆庇萬邦養育庶類來請歸命伏惟

皇上從來興滅繼絕中外一體寬仁恩育宜准土謝圖

汗折卜尊丹巴之降俾令得所

命尚書阿爾尼侍郎溫達查明現在不能度日人等

將副都統阿玉璽所運歸化城米糧均散賑濟

土謝圖汗等本宜仰體

聖慈即議給以名爵但各路請降喀爾喀首領甚多應

俟到日再議

上從之

臣謹按方喀爾喀之內自相亂外挑強鄰

皇上早灼知其必至敗亡不憚多方以告戒之及土謝圖汗等違我節制首起兵端以至敗衄時聞凶荒洊告又復宥其罪愆存其汗號且示之可生之路資以牲畜助以糗糧內之近邊示之法度使起待斃之衆相安相聚不至於流

離凡所以養欲而給求者委曲周詳始終弗
替我

皇上之撫恤要荒興滅繼絕真可謂與覆載齊量怙恃
同仁者歟

十一月甲申

遣官往諭土謝圖汗等侍衛阿南達喇嘛商南多爾
濟等歸奏言噶爾丹謂七旗喀爾喀非吾讐也
但土謝圖汗折卜尊丹巴兩人乃壞宗喀巴教

之人

中華皇帝欲彼安集反負

恩違

旨殺扎薩克圖汗得克得黑墨爾根阿海盡俘其國
我靜處於此而忽來侵掠我境殺我弟多爾濟
扎卜壤教構難誠無地可容之人也今若滅此
想

中華皇帝與達賴喇嘛之心亦得安矣若輩仍存必又

違

旨不自靖也噶爾丹又問折卜尊丹巴所居何地臣
等答以在邊汎之外及衆喀爾喀亦填居邊上
噶爾丹言不放彼入邊彼將何往

中華皇帝之意旨行事與我脗合我不勝欣悅臣等又
令商南多爾濟滾楚克達爾漢囊素轉說之噶
爾丹曰汝等諭我以禮法我甚喜悅我並無自
外於

中華皇帝達賴喇嘛禮法之意但厄魯特行事粗鄙恐不相合耳噶爾丹又以貿易事遣滾楚克達爾漢囊素來告曰厄魯特從來進貢貿易各自分行今既不得往來我國之人殊為憂苦今或印文或不用印文照常行走候

旨定奪遵行乞以此轉奏奏至

旨下議政王貝勒大臣集議議曰

皇上軫念兩國原無異視今土謝圖汗等背棄盟誓殺

扎薩克圖汗及得克得黑墨爾根阿海又先犯
厄魯特殺噶爾丹之弟多爾濟扎卜實係伊等
之過應遣

勅於達賴喇嘛命遣一有名大喇嘛同

本朝所遣大臣前往召集噶爾丹土謝圖汗等令土
謝圖汗等自陳其過大集會閱永議和好於未
遣

勅之前以此等情節先曉諭土謝圖汗等如皆允服

願行則約期於來年會閱如別有推辭俟到日
再議噶爾丹奏請貿易之事應俟遣使大臣時
再議

上從之

十二月丁卯

命以車臣汗之子吳默赫台吉承襲汗號時已故車
臣汗之妻及其子吳默赫率其屬裔來降奏言
昔當治化隆平之日臣祖車臣汗歿仰蒙

聖鑒

勅諭左右兩翼汗立臣父為汗旋又歿曾以情節上

奏想因兩汗交惡稽遲未蒙見答為此具由謹

奏

上諭曰吳默赫准襲為車臣汗其車卜登車臣濟農達

賴台吉布達扎卜額爾德尼台吉在已故車臣汗

為祖輩車卜登車臣濟農應授為扎薩克其達賴

台吉布達扎卜台吉授為濟農并授為扎薩克其

已故車臣汗之叔達里伊爾登台吉巴故車臣汗
之弟益楚克伊爾登台吉納木扎爾額爾德尼台
吉俱授為濟農吳默赫年幼國事著伊親叔納木
扎爾額爾德尼台吉協理

康熙二十八年正月丁亥

遣使賚

勅諭達賴喇嘛時土謝圖汗以親往會閱為難具疏

自陳

上諭議政王等曰朕統御天下凡窮者救之絕者繼之
離散者使之聚交惡興戎者必使之和協一切生
靈無不欲其咸底於安樂也土謝圖汗折卜尊丹
巴庫圖克圖等背棄盟誓殺扎薩克圖汗得克得
黑墨爾根阿海又加兵厄魯特殺噶爾丹之弟多
爾濟扎卜今為厄魯特所敗奔入我喀倫請降朕
念土謝圖汗向來職貢惟謹久在屬國之列是以
受而納之留於邊境矜其困窮給以米粟車臣汗

之子亦准其承襲但兩國相攻生民不得又安兵
戎無日休息今土謝圖汗折卜尊丹巴等又難於
會閱其以朕收養伊等中外一體不忍令人失所
之德意併將土謝圖汗等背盟興戎之過一一申
明遣使賫勅宣諭噶爾丹達賴喇嘛令達賴喇嘛
亦遣使於噶爾丹如此則案可速結矣其達賴喇
嘛處著伊拉古克三庫圖克圖商南多爾濟他巴
克去噶爾丹處應遣之人俟草青時奏請

賜達賴喇嘛勅曰朕統御寰區惟願中外息征戰之
勞無敗亡之禍率土共享昇平前聞喀爾喀兩翼
部落內自作亂兄弟人民互相吞并日後必成戰
爭之禍特勅諭爾喇嘛同遣使人諭和爾喇嘛亦
謂朕鑒恤衆生心如父母誠至善也遣西勒圖來
朕特使台吉巴忒馬什尚書阿爾尼等與西勒圖
偕往召集七旗喀爾喀會閱誓和意謂從此兄弟
相親可永享安樂後土謝圖汗奏言聞厄魯特興

兵兩路來伐臣是以出兵往迎朕軫念厄魯特喀爾喀兩國相攻必有一傷復遣書於爾喇嘛息其干戈仍勅諭喀爾喀土謝圖汗以為厄魯特噶爾丹職貢恭順往來有年果似此大舉諒必奏聞於朕朕心猶未深信未必非不良之徒從中離間爾等慎毋先啟兵端務體朕不忍生民死亡之至意爾喇嘛亦遣齊緝克他賴堪布偕朕阿齊圖綽爾濟學士拜里往厄魯特諭和朕與爾反覆行事原

不忍視喀爾喀厄魯特至於塗炭欲其相睦衆生
得安之意也乃喀爾喀土謝圖汗折卜尊丹巴庫
圖克圖等自取滅亡違旨興戎首先起兵殺扎薩
克圖汗又殺噶爾丹之弟多爾濟扎卜噶爾丹遂
起兵破喀爾喀此喀爾喀先舉召釁之過朕不以
之責噶爾丹也朕之初念本欲率土之民皆獲生
成原無樂他人之敗亡以為已利之意今喀爾喀
敗汗及濟農諾顏台吉等率其通國決計歸降於

朕朕為天下主來歸之人不為收養其誰收養之
爰納其降安插於喀倫之外發粟賑濟仍存其汗
濟農諾顏台吉之號嗣立車臣汗之子為汗朕興
滅繼絕之心非特於喀爾喀如是已也諸國有窮
迫來歸者朕之愛養皆與之同不但朕之所行如
此喀爾喀等如往歸爾喇嘛決不忍其死亡亦必
如此愛養之也征戰非美事互相報復無有已時
亦豈能保其常勝乎朕意欲使厄魯特喀爾喀盡

釋前怨仍前協和各守地方休兵罷戰特遣使賚
勅往諭噶爾丹噶爾丹向遵奉爾喇嘛道法爾喇
嘛若遣使往諭務令兩國嗣後永息兵戎則朕與
爾解紛卹難之本心亦可以慰矣爾喇嘛可即遣
使與朕所遣伊拉古克三庫圖克圖商南多爾濟
理藩院司員他巴克同往

四月己卯

命尚書阿爾尼等賚

勅諭噶爾丹理藩院以遣使厄魯特之大臣官員喇

嘛等上請

諭曰此事關係重大著尚書阿爾尼散秩內大臣吳
巴什歸化城扎薩克大喇嘛阿齊圖綽爾濟一等
侍衛阿南達等前往阿爾尼等入請

訓旨

上諭曰噶爾丹必問及巴圖爾額爾克濟農之事最為
緊要爾等但述丑年四月之約並言達賴喇嘛向

雖遣齊緝克他賴堪布至西海之地及我使者定
議令羅卜臧滾布阿拉卜灘與巴圖爾額爾克濟
農等同居一處至今尚未同居且巴圖爾額爾克
濟農雖在我地駐扎並未受彼歸順分為旗隊况
厄魯特喀爾喀交惡之後巴圖爾額爾克濟農請
曰乘此機會欲復我讐但我兵器已易粟而食乞
賜我等兵器亦曾諭而遣之曰厄魯特喀爾喀向
俱誠心朝請職貢朕並未嘗異視但欲使兩國罷

兵安生而已豈肯給爾兵器使爾興戎耶其以是
答之將此等案卷俱錄之以往爾等閒論時當以
已意語吉爾噶郎寨桑曰噶爾丹倘不奉詔則絕
爾等每年進貢貿易之路厄魯特人衆必大失利
矣阿爾尼等又奏言噶爾丹有請

安進貢貿易等使欲與臣等偕發臣等應令其同來
上是之

賜噶爾丹勅曰朕統御宇內率土生民皆朕赤子一

夫失所朕心憫焉雖窮鄉異域之民亦必撫養俾
以安和各得其所前聞喀爾喀右翼扎薩克內自
作亂兄弟屬裔多歸左翼其左翼扎薩克兄弟屬
裔亦有歸右翼者喀爾喀兩翼七旗汗濟農諾顏
台吉等皆累世職貢與本朝通好今彼兄弟互相
吞噬異日必至交攻作亂特勅達賴喇嘛約同遣
使諭令和好共享安樂達賴喇嘛謂朕垂憐衆生
同於父母意甚善也故遣噶爾丹西勒圖與朕所

遣台吉巴忒馬什尚書阿爾尼等偕往使七旗喀爾喀會閱令其兄弟立誓此乃朕欲喀爾喀汗濟農諾顏台吉等式好無尤同享安樂之意也其後土謝圖汗奏至云聞厄魯特兩路來攻因而興兵迎敵朕念厄魯特喀爾喀皆累世職貢不絕並無異視若果交惡有一殘毀朕心殊為不忍故勅所司傳檄於爾復諭喀爾喀土謝圖汗曰厄魯特噶爾丹恭順職貢有年果舉此大事豈有不奏聞於

朕者或係不逞之徒從中文構離間若厄魯特未
動而爾等先舉則此亂自爾始矣達賴喇嘛亦遣
其齊緝克他賴堪布與爾解紛朕又遣阿齊圖綽
圖濟學士拜里前往此朕待厄魯特喀爾喀一體
無異之至意也乃喀爾喀土謝圖汗折卜尊丹巴
庫圖克圖等自作弗靖違旨興戎又先發兵殺扎
薩克圖汗及得克得黑墨爾根阿海又殺爾弟多
爾濟扎卜是自取滅亡耳爾因彼先舉遂興兵破

喀爾喀其過在喀爾喀不在爾也爾本敬奉佛教之人雖焚喀爾喀地方廟宇毀其佛像朕亦不深責爾今喀爾喀為爾所敗其汗濟農諾顏台吉等率舉國之人前來歸朕朕矜其流離窮困雖向非屬國而隨屬國之列誠心職貢且追念彼為元之苗裔窮而來歸即以所屬待之朕統御天下來歸之人若不收撫誰撫之乎故受而安插於喀倫之外其窮困人民賑以米糧而嚴責其興戎之罪復

其汗濟農諾顏台吉之號以車臣汗之子仍襲為
汗朕興滅繼絕之念非特於喀爾喀已也諸國有
窮迫來歸者朕皆一體撫養不但朕所行如此即
達賴喇嘛養育衆生之洪仁亦與朕同伊若歸達
賴喇嘛亦必如是撫之戰爭非美事展轉報復將
無已時讐敵愈多亦不能保其常勝是以朕欲爾
等解釋前讐互市交易安居輯睦永息戰爭特遣
使賚旨前來汝果遵朕持正執中令歸同好之旨

自今以後各守其地不興兵戎既不失輯睦之道
與爾兩國人民亦免塗炭爾豈不欲爾屬人民安
生樂業乎朕普恤羣生俯念爾素不違旨特遣尚
書阿爾尼等諭意又令伊拉古克三庫圖克圖商
南多爾濟等與達賴喇嘛使人同往

甲午

遣侍衛吳大禪等監運張家口倉糧賑喀爾喀先是
土謝圖汗等以

恩賜米糧將盡續到二萬餘人不能贍給奏請賑濟
上命內大臣費揚古明珠侍郎阿山學士拜里等賚銀
兩茶布前往散給至是

上諭大學士伊桑阿等曰朕聞喀爾喀乏食有至餓死
者深為軫念頃雖令內大臣費揚古明珠等賚茶
布銀兩採買牲畜賑其乏絕但採買尚須時日今
若不速發糧以拯之則死者愈多矣折卜尊丹巴
庫圖克圖現有貿易駱駝百餘在張家口費揚古

明珠等同往大臣官員所有駱駝亦令其量捐並
內駟廠及太僕寺駱駝共發一百將張家口倉米
星速運到散給計支一兩月間而費揚古明珠等
所買牲畜已繼之矣如此則喀爾喀可活也其令
侍衛吳大禪侍讀學士西拉牧廠侍衛太僕寺堂
官戶部賢能司官各一員經理其事明日即馳驛
速往

五月壬戌

命巴圖爾額爾克濟農暫統羅卜臧滾布部落時提督孫思克報稱厄魯特羅卜臧滾布病故其妻與寨桑等以噶爾亶多爾濟係車臣汗嫡孫年約十歲乃羅卜臧滾布叔伯之子為兄弟行欲遣人往召令其統領部衆理藩院以

聞

上曰羅卜臧滾布率所屬來歸恪守法度誠心職貢可遣官致賻羅卜臧滾布既亡部落人民無所統屬

其弟噶爾賚多爾濟召之恐未能即到聞巴圖爾額爾克濟農意欲先往令馬廸傳諭巴圖爾額爾克濟農與之同去噶爾賚多爾濟未到之先令巴圖爾額爾克濟農暫為約束人民俟其到日仍歸本地毋得以噶爾賚多爾濟年幼欺凌謀占務期同心一意共相扶掖馬廸等仍遣人往召噶爾丹多爾濟

癸亥

命各旗蒙古並察哈爾等備兵理藩院奏言去年八月內因喀爾喀厄魯特於邊境構兵

上命蘇尼特四子部落毛明安吳喇忒鄂爾多斯等旗共派兵六千俱令環繞邊汛駐備形勝之地又令歸化城兩旗派兵一千屯駐城內以備緊急調遣今既傳聞厄魯特發兵二支一支從阿爾泰之後攻昆都倫一支從達爾漢親王旗分之北前進應較去歲所發之兵量減其半仍令前

所派領兵王貝勒台吉等照常備之八旗遊牧之地所有察哈爾兵內不論護軍驍騎選人材健壯者一千備之得

旨著各在家預備以候調遣

九月庚申尚書吉爾他布等歸奏喀爾喀駐牧邊境情形時吉爾他布等奉

命至額爾班格得爾古之地分遣理藩院員外郎常壽戶部郎中畢力克兵部郎中巴扎爾等往查

喀倫內蘇尼特等地方所駐喀爾喀汗濟農諾
顏台吉等遊牧處水草俱善內地蒙古水草亦
不至匱乏偷竊小盜或時有之吉爾他布等具
疏奏

聞

上以盜竊時有皆本管人員怠玩所致著兵部嚴行禁
約

十月辛未

命科爾沁土謝圖親王沙津等以法度訓諭喀爾喀

諸部

上諭議政王等曰喀爾喀入降者饑困已極自相劫掠若不速置扎薩克遣賢能蒙古王台吉等曉示法度收集離散將益至泮澳爾等其確議以聞議曰喀爾喀敗散之後陸續來歸

皇上俯視中外一體給以米糧牲畜俾得其生誠

如天之仁也復以喀爾喀散亡之餘若無法度任意

妄行必益至離散預為籌度

聖諭周詳皆宜欽遵而行喀爾喀扎薩克內有已至者
有未至者除左翼土謝圖汗折卜尊丹巴墨爾
根濟農羅卜臧台吉等分編旗隊之處暫置不
議外左翼車臣汗協理納木扎爾額爾德尼濟
農盆楚克伊爾登濟農車臣伊爾登濟農洪俄
爾帶青台吉車卜登額爾克台吉信順額爾克
帶青諾顏所屬敖巴額爾克阿海台吉右翼白

蘇特察罕巴爾諾顏車臣台吉額爾德尼哈灘
巴圖爾台吉等皆大台吉也俱宜授為扎薩克
仍存其喀爾喀名號又陸續來降喀爾喀沙布
隆庫圖克圖所屬阿爾達兒諾爾卜等扎薩克
俱未到各隨彼所願歸旗分收附俟扎薩克到
日再議至土謝圖汗所屬齊巴克台吉之夥伴
等皆令併與土謝圖汗及信順額爾克帶青諾
顏其車臣汗之信順額爾克帶青諾顏等俱照

四十九旗編為旗隊於陰山後各旗蒙古賢能
都統副都統長史叅領之中每一扎薩克選二
人與派出之蒙古王等帶去令其駐扎彼地以
來年草青時為期指示法禁如四十九旗一例
施行喀爾喀所居遙隔應以車臣汗為兩路信
順額爾克帶青諾顏為一路敖巴額爾克阿海
台吉察罕巴爾諾顏為一路車臣台吉額爾德
尼哈灘巴圖爾台吉為一路遣行此所遣蒙古

王台吉等與理藩院大臣官員職名伏候

上裁其點出之大臣台吉官員等至彼處明諭扎薩克等限來秋各將散失之人盡行收集若過期即給與收養之旗分倘仍有應授扎薩克者即會同扎薩克等授為扎薩克列名奏

聞該衙門注冊其車臣汗之信順額爾克帶青諾顏等向係扎薩克伊等所屬後授小扎薩克如有大事仍令稟聞完結右翼扎薩克察罕巴爾諾

顏額爾德尼哈灘巴圖爾車臣台吉等其舊扎
薩克未到伊等事件即令伊等自行完結議入
諭曰車臣汗之兩路著為一路遣土謝圖親王沙津
台吉阿拉卜灘台吉巴忒馬什侍郎溫達去信順
額爾克帶青諾顏敖巴額爾克阿海台吉為一路
遣達爾漢親王諾內台吉畢力克圖台吉德木楚
克郎中布顏圖馬迪去察罕巴爾諾顏車臣台吉
額爾德尼哈灘巴圖爾台吉為一路遣台吉多爾

濟思希卜台吉吳爾圖納蘇圖副都統馬什侍讀
學士達虎郎中巴扎爾去

賜喀爾喀勅曰朕統御宇內撫育萬邦率土人民皆
我赤子倘一夫失所朕心惻焉雖窮荒異域之民
亦必撫養使之各得和樂此朕本意也前聞爾喀
爾喀兩翼之汗濟農諾顏台吉等互吞屬裔不相
親睦恐兄弟不和異日必致有侵凌之禍特遣尚
書阿爾尼台吉巴忒馬什等會盟令爾兄弟誓和

後果以不和之故與厄魯特噶爾丹交惡相攻爾
為所敗棄其妻子土地屬裔牲畜迫而來歸朕念
爾歷世誠心職貢不忍爾之散亡安插於喀倫內外
賑其窮餓令爾汗濟農諾顏台吉等安集如故以
車臣汗之子襲其汗號朕暫留爾等收集散亡俟
厄魯特事定之日仍歸故地駐牧今見爾等並無
法度不能約束以強凌弱自相劫奪倘不速行曉
諭定法督察則汝現在人民益至離散矣是以將

車臣汗旗下納木扎爾厄爾得尼濟農益楚克伊爾登車臣伊爾登濟農洪俄爾帶青台吉車卜登額爾克台吉信順厄爾克帶青諾顏旗下教巴厄爾克阿海台吉右翼白蘇特查漢巴爾諾顏車臣台吉額爾德尼哈灘巴圖爾台吉等增設扎薩克牧集離散之衆分為旗隊以便督察禁止盜賊妄行教以法度特令土謝圖親王沙津達爾漢親王諾內台吉多爾濟思希卜等賞勅諭扎薩克王等旗

下都統副都統長史等官每扎薩克著二員駐至
來年草青之時示以規模安插前去爾等自今以
後果能欽遵朕旨謹守法度寇盜不興禍亂不作
爾等遺民漸次得所庶不負朕撫育歸降愛養羣
生之至意

乙酉尚書阿爾尼自厄魯特歸覆

命阿爾尼奏言臣等八月初七日抵厄魯特噶爾丹
之地頌

勅書賞物畢臣等與噶爾丹行抱見禮既坐問臣阿爾尼曰公即來盟喀爾喀七旗之尚書耶曰然又問云聞爾去歲往色稜格地方以何事而去亦有兵否臣答曰俄羅斯察罕汗奏請東方邊境之事當何地會議

聖上遣我往諭以色稜格地方會議所攜兵僅及二千而已中途值汝厄魯特與喀爾喀之亂

聖上聞之念厄魯特喀爾喀交戰我等經行汝等必各

疑為援兵故令駐境上今年復遣議此事語畢
乃饗臣等本月十八日噶爾丹招臣等入其廬
屏人言曰

聖上洪仁惠育羣生欲使協和共享昇平我亦與其中
也我身安樂之策孰者為善伏祈

聖上指示願得遵行但折卜尊丹巴士謝圖汗等首作
禍亂無故起兵殺扎薩克圖汗及得克得黑墨
爾根阿海違

聖上之旨意前此再三陳奏為此兩人耳臣等答之曰
折卜尊丹巴士謝圖汗等窮迫亡命來歸我

皇上為統馭天下中國之主此一二人之命有不思生
全之者乎至爾屢次章奏

聖上明鑒久已晰彼之曲諒爾之直始降

勅書諭止戰爭仍歸和好爾又何必屢以此事為言
耶二十二日噶爾丹遣丹濟喇及格壘古英以
覆奏疏授臣臣等詰之曰達賴喇嘛使人及伊

拉古克三庫圖克圖等亦為此事將至亦此語覆之抑或有他語乎丹濟喇以其汗之言來覆曰達賴喇嘛所言之事若與

聖上勅諭相同我自無他說也二十四日噶爾丹西向遊牧臣等越宿於次日起行而歸得

旨厄魯特喀爾喀皆職貢之國頃者兩國交惡相攻朕不忍見伊等無知爭殺不得安生特遣大臣開導曉諭仍前和好今噶爾丹稱聖上洪仁惠育衆

生欲使協和共享昇平我亦與其中聖上指示願
得遵行已具悉矣所司知之

十一月丙辰

命厄魯特額林宸台吉與韓都台吉同居時額林宸
奏言我父楚呼爾吳巴什乃厄魯特胡他蓋圖
哈爾呼喇諾顏第三子也楚呼爾吳巴什生子
五人長子班第為噶爾丹所殺次子阿南達三
子羅卜臧庫圖克圖四子勞章俱歿五子額林

宸即我也來投

皇上我親兄班第長子多爾濟塞卜騰在噶爾丹所次
子乃與巴圖爾額爾克濟農同居之韓都台吉
是也康熙十五年噶爾丹伐我父楚呼爾吳巴
什執之殺我親兄班第分散我屬裔監守我父
子去歲厄魯特喀爾喀作亂交戰守我之人乃
我屬下舊人為所分散者皆背噶爾丹而向我
我得間而攜我子弟台吉十餘人弓箭手五百

餘人計一千餘口來投

皇上我父不能得脫現在噶爾丹所我來至巴圖爾額爾克濟農額爾德尼和碩齊地方與我兄子韓都台吉同居安插何地作何措置伏候

皇上垂憐加恩

上曰額林宸台吉為噶爾丹所禁今逃出歸降其令與韓都台吉等暫且同居并令約束其下毋致盜竊生事現今理藩院郎中桑格往審番人情事即將

此事交與桑格

十二月辛未

遣使賞

勅諭達賴喇嘛時達賴喇嘛遣使善巴陵堪卜來貢

請

安且密奏言我起行時往達賴喇嘛所未見諦巴出語我曰達賴喇嘛令奏

聖上但擒土謝圖汗折卜尊丹巴庫圖克圖昇噶爾丹

則有利於生靈此兩人身命我當保全之奏

聞

上遣班雜爾拉木扎木巴額木齊格隆等賚

勅諭達賴喇嘛

勅曰朕恭膺

天命統御率土人民無分中外皆欲使之罷征息戰各
享安樂以免散亡諸處之民有困窮來歸者必使
之得所初無異視爾喇嘛承奉釋教濟度衆生朕

與爾同一意也厄魯特喀爾喀向于朕為職貢之
國亦供奉爾喇嘛為施主聞兩國交惡相攻朕與
爾會同諭其罷兵使相和睦發勅遣使不啻再三
此朕與爾念厄魯特喀爾喀相攻必有一家敗亡
失所而欲止其戰爭同歸于好原非有偏徇一家
之意也後厄魯特喀爾喀不從朕與爾之旨竟至
交戰喀爾喀敗窮極來歸朕受之安插邊塞內外
給米糧牲畜以濟其困若等如往歸爾喇嘛想喇

嘛亦必如是以養之也今爾喇嘛所遣使人善巴陵堪卜奏稱爾之言曰當擒土謝圖汗折卜尊丹巴庫圖克圖畀噶爾丹伊等身命我當保之凡作君作師者濟窮繼絕乃不易之常經今如擒土謝圖汗折卜尊丹巴庫圖克圖而畀噶爾丹是偏于一家矣朕與爾向來欲厄魯特喀爾喀相與和好之意安在乎朕與爾向來之意舉無所偏庇是以屢屢遣使往諭即今亦仍冀其和好也目下朕遣

尚書阿爾尼使于噶爾丹據其所奏言噶爾丹敗于策旺拉卜灘下人散亡略盡又極饑窘至以人肉為食喇嘛使人亦曾到彼想亦聞之耶倘噶爾丹甚不得已而來歸朕朕亦當受而養之使得其所有執之以畀其仇者乎朕撫視萬邦有如一體意無偏徇者如此爾喇嘛行事利濟衆生想善巴陵堪卜所奏未必為喇嘛之言如果喇嘛之言何以不具疏來奏乎朕心疑之特撰勅遣詢著將此

項原由明白具本回奏

丙子

命厄魯特噶爾賚多爾濟為諾顏噶爾賚多爾濟奏

言蒙

聖明軫念鄂齊爾圖汗賜羅卜臧滾布遊牧之地正將
遷移聞喀爾喀厄魯特交亂興戎因率兵前往
未能全徙出征還羅卜臧滾布身故蒙

聖上遣官二員賜羅卜臧滾布浩蕩之恩又恐人民散

亡授我為諾顏


聖主恩綸下頒如日重升不勝懼怵但地方遠隔且去年遭遇旱災牲畜倒斃人民困苦難以遷移伏

祈

皇上鑒恤理藩院議以噶爾賚多爾濟止令統轄羅卜臧滾布之衆並未授為諾顏乃奏內自稱諾顏不合其貧民應遣官往查再議得

旨噶爾賚多爾濟著授為諾顏遣達虎前往傳旨併

查看貧民



聖祖仁皇帝親征平定朔漠方略卷五

欽定四庫全書

史部

平定朔漢方略卷六

七六

詳校官編修臣曹振鏞

編修臣裴謙履勣

總校官進士臣繆琪

校對官中書臣朱烜

謄錄監生臣陳昌敬

欽定四庫全書

聖祖仁皇帝親征平定朔漠方略卷六

康熙二十九年正月庚申

遣官賑喀爾喀時土謝圖汗以所部六千餘人乏食
請賑部議不許

上特命給以獨石倉粟戶四斗遣理藩院及戶部司官
各一員會同土謝圖汗監視散給自後車臣汗
拊卜尊丹巴庫圖克圖等乏食來告者前後千

萬計

上皆命按口量給之

辛酉

遣侍郎溫達覘噶爾丹情形時因噶爾丹肆掠喀爾喀

上命理藩院侍郎溫達至喀爾喀墨爾根濟農所確覘噶爾丹情形

三月癸巳

命定大閱日期

上諭尚書阿爾尼等曰今喀爾喀汗等率衆來降應令四十九旗與之會同大閱其令議政王貝勒大臣

集議議曰

皇上聲教遠被喀爾喀土謝圖汗車臣汗諸濟農諾顏等皆傾心來歸應出臨大閱永使奠定其四十九旗會閱之事今歲暫停俟來年照例與喀爾喀大台吉等會閱奏入得

旨著於七月舉行餘如所議

庚子

命尚書阿爾尼等往探厄魯特所向先是喀爾喀拖多額爾德尼台吉與厄魯特戰敗時有達爾濟者為厄魯特所執至是逃出詣軍前來歸言厄魯特掠拖多額爾德尼時雖獲其牛羊不敷軍食頃聞噶爾丹率兵萬餘將至或言留其孥於額德爾地方又曰噶爾丹令柰冲鄂木布卜行

師不吉因居巴顏烏蘭誦經三日沿克魯倫河
下流而去侍郎溫達以

聞

上命阿爾尼吉爾他布前往偵厄魯特情形如彼尾追
喀爾喀而來即調所備之兵以防之一面疾速奏
聞

壬寅

命給發伊拉古克三庫圖克圖等行糧伊拉古克三

等奏言

臣

等去年九月自肅州起行十一月初

三日至通欽腦兒遣噶卜楚等前偵噶爾丹所
在行十五日見噶爾丹告以故噶爾丹曰我軍
已起行且曠野不能會也其約見於他米爾地
方且遣使鄉導臣等遂輕裝疾馳十二月初五
日至他米爾之北齊勞圖河噶爾丹不至遣人
至額德爾河偵探之河之兩岸俱有噶爾丹兵
馬行踪臣與濟隆庫圖克圖尾之前往令商南

多爾濟攜疏歸奏且請運糧以繼之

上命給太僕寺駱駝三十頭運殺虎口倉米三十石隨
商南多爾濟往塞內交綠旗兵塞外交蒙古兵護
送

癸卯

命調外藩官兵併設驛站先是理藩院以大閱事奏
遣司官二員乘驛赴阿南達溫達所預調俄儂
土喇等處駐扎之喀爾喀諾顏台吉集兵設站

以待至商南多爾濟歸奏知噶爾丹情形

上因諭尚書阿爾尼曰爾院昨議遣司官二員今命一員至鄂爾多斯發兵一千五百以貝勒宋拉卜率之一員至歸化城發兵五百喀爾喀達爾漢親王及四子部落共發兵一千以達爾漢親王諾內率之而檄侍郎溫達令預發喀爾喀墨爾根濟農敖巴額爾克阿海蘇泰伊爾登台吉之兵共三千名以待以蘇泰伊爾登拖多額爾德尼率之偕調兵

司官往溫達所賚三月糧隨溫達赴土喇河仍自
京遣大臣一員與溫達阿南達偕統其軍爾同吉
爾他布速赴阿南達所往之地先檄阿南達來京
再詣溫達所自屯軍之地至喀倫酌派喀爾喀人
等安設驛站

命都統額黑訥護軍統領馬喇前鋒統領碩鼐等出
征額黑訥等瀕行

上召至

乾清宮

諭之曰朕已遣侍郎溫達往調喀爾喀親王諾內等
兵共三千爾等至歸化城與溫達即率其兵赴土
喇與阿爾尼吉爾他布等會爾等習於兵事機宜
無俟朕言其就水草善地放養馬駝一路前進仍
各賜內廐馬駝以行

丙午

授喇嘛商南多爾濟應對噶爾丹之詞商南多爾濟

將行

上諭曰汝往偵實速馳報聞汝見噶爾丹如問溫達等
至土喇之故則曰往迎濟隆庫圖克圖等耳且因
塞外多歧不知歸自何路似此在在遣迎吾烏得
而知之彼如問兵來之故則曰非兵也乃往勘展
界耳如噶爾丹敗竄則諭之歸降如其勢尚強歸
故巢則往說之若問其使人則曰汝古英寨桑等
在京俟草長始遣之也此兵事機宜汝宜書之以

往

庚戌侍衛阿南達奏報噶爾丹情形阿南達奏
言_臣於二月二十日至車臣汗納木扎爾額爾
德尼濟農所宣

上諭曰近已遣使與噶爾丹約信而歸今其奏使尚在
京師興兵之事必傳聞不實然噶爾丹狡不可信
倘沿克魯倫河而來至車臣汗之地則令車臣汗
土謝圖汗墨爾根濟農等協力相機行事其車臣

汗之兵令納木扎爾額爾德尼濟農領之洪俄爾帶青副之宣

諭畢皆稽首言曰我等藉

聖上威靈何畏於噶爾丹彼兵果來我等協力捍禦當分十二扎薩克之兵一萬備之臣復至車卜登

台吉所遣筆帖式色稜敦住等前往偵探噶爾丹已於正月十六日親率兵從吳達漢嶺而別遣阿拉卜灘滾占罕都等率兵從木代喀拉色

古爾山陰俱會於烏爾扎河往掠昆都倫博碩
克圖復回劫車臣汗部衆乃歸杜爾伯特之鄂
勤台吉率兵千餘過拖諾向克魯倫河下流而
去色稜敦住歸報臣即檄遣車臣汗納木扎爾
額爾德尼濟農等集兵衆徙輜重於近邊古爾
班哈達土之地而身率四阿霸哈納爾兵四千
往會之

甲寅侍讀學士達虎奏報噶爾丹情形時達虎

奉

命取巴圖爾額爾克濟農羅卜臧額林宸韓都台吉
等口供畢聞達賴喇嘛使人他賴堪卜自噶爾
丹處歸至嘉峪關外駐大草灘因往見問其情
事他賴堪卜曰伊拉古克三庫圖克圖商南多
爾濟及達賴喇嘛使人濟隆庫圖克圖等於十
二月初三日已見噶爾丹初五日噶爾丹遣使
偕我赴達賴喇嘛所汝使臣我等已見之我等

往達賴喇嘛處復來汝使臣方歸也又問曰然則噶爾丹今在何處見我使臣於何地今畱我使而遣汝於達賴喇嘛何也我使臣有書附汝乎曰噶爾丹在和卜多選兵征喀爾喀至扎卜喀之地見汝使臣其情事具噶爾丹書內我不得而知也汝使臣並無書附我又密問其隨行人喀爾喀等言噶爾丹原向洪郭羅而進因聞阿奴可敦策旺喇卜灘等漸徙入其故巢遂往

入和卜多地方寇盜滋生饑斃甚衆他賴堪卜
等於十二月初五日自和卜多起行後聞噶爾
丹分其部貧人令丹津鄂木卜率之居守而身
與丹濟喇格壘古英柰冲鄂木卜等收兵自和
卜多東向往征喀爾喀等部其所云已見使臣
之說妄也又問噶爾丹兵力強弱如何曰其屬
雖有兵數千然馬甚少且聞其下多有逃歸策
旺喇卜灘者其往征喀爾喀有所掠猶可不則

將自內亂矣達虎具疏奏

聞

上命檄尚書阿爾尼知之

四月甲子

命調察哈爾兵從征阿南達至入

見面奏畢

上諭內大臣國舅佟國維等曰據阿南達奏言厄魯特
與拖多厄爾德尼戰頗被殺傷其襲西布推哈灘

巴圖魯時兩人共一騎有斬木為兵者且聞來侵
昆都倫博碩克圖而至今未到想已狼狽必有退
回俄農之勢阿南達欲帶行礮併禁軍前往相機
征勦朕非不知禁軍足以克敵但路遠艱於糧運
朕前率察哈爾兵行獵見其人材壯健皆思効力
可選精銳六百左翼令阿要率之右翼令博爾和
代率之馬駝牛羊於八旗大場內派出兵各攜五
月糧再於漢軍每旗選章京一員領行礮八門及

礮手前往檄阿爾尼額黑訥知之

勅訊策旺拉卜灘及阿奴與噶爾丹交惡情由

上諭內大臣國舅佟國維等曰比聞厄魯特策旺拉卜灘阿奴與噶爾丹交惡情事未悉應頒勅書詢其故并量加恩賞前達虎出使尚在嘉峪關即令達虎前往宣諭因

賜策旺拉卜灘及阿奴勅曰朕撫育萬邦率土之人皆欲其協和安輯今聞爾等與噶爾丹不和致啟

爭端爾厄魯特向修職貢恭順惟謹今乃內自交
惡必有其因朕甚憐之遠聞之言虛實難據特遣
侍讀學士達虎賚御用各色緞二十疋賜策旺拉
卜灘阿奴其以爾等交惡之由明告使臣毋隱

己巳

命副都統李林隆賚礮與侍衛阿南達同赴土喇漢
軍都統副都統會議火礮實軍中利器每旗各
發一具尚少請倍之每礮令將領一員軍校礮

手二名與俱於臣等內遣一二人率之前赴土
喇奏入得

旨李林隆人才雄偉練習軍務著總管火礮與阿南
達偕往尋又令都統楊文魁副都統伊壘率漢軍
二百名繼之行

甲戌喀爾喀請購辦軍器先是喀爾喀厄魯特
不得購辦軍器至是理藩院奏喀爾喀濟克巴
台吉等請市軍器以備噶爾丹

上許之

乙亥

命侍衛阿南達率兵赴都統額黑訥軍先是阿南達

奏言

臣

所率兵請與阿爾尼兵合為一勢方壯

上曰兵事重大其令阿爾尼等各陳所見至是阿爾尼

吉爾他布奏曰

臣

等竊思額黑訥等若沿邊來

時候非宜恐跋涉艱苦況

廟謨已定應遵前

諭赴所指之地以行至阿南達所領察哈爾兵及行

礮令前赴

臣

軍其諸部落兵期會於綽嫩河今

車臣汗已抵綽嫩河西北洮瀨河矣

臣

等亦驛

召所調扎薩克兵來會於洮瀨河至噶爾丹來

從何路及昆都倫博碩克圖在何處訪問未的

俟所調到即遣人偵探事當急行則

臣

奏

聞即發緩則請

旨後行奏至

上諭曰阿爾尼吉爾他布仍往前所指示之地額黑訥
等既往西路止帶諸扎薩克及喀爾喀兵恐力寡
不敵阿南達速領軍往額黑訥所策應仍遵前諭
行

五月乙未

命歸化城副都統阿玉璽輸運軍糧時都統額黑訥
等率兵前進需用軍糧

上令歸化城副都統阿玉璽取殺虎口倉粟二百石負

以太僕寺駱駝隨車輸運

辛丑扎薩克圖汗子額爾克阿海巴郎具疏請

襲汗號額爾克阿海巴郎奏言臣父扎薩克圖

汗喀爾喀七旗之長君也為左翼土謝圖汗所

殺屬裔分散我身又為厄魯特所收棲我於阿

爾泰山之南今乘間得出來投

皇上伏乞

聖恩賑恤恩養俾得繼立其所屬諾顏達爾馬什里亦

以此情事具疏奏

聞事下議政王貝勒大臣議議曰扎薩克圖汗歷世
恭順職貢有年似應繼立查今年衆喀爾喀來
降已定期會閱而永奠之其所請應於盟地定
奪

上是之

癸丑

命外藩王等率兵同禁軍赴尚書阿爾尼軍先是阿

爾尼遣蒿齊忒都統勞章等與郎中馬廸訪昆
都倫博碩克圖所在至是歸報曰渡克魯倫河
遇昆都倫博碩克圖言我於正月自俄儂遊牧
思近邊依我

皇上威靈而聞厄魯特漸近避之至烏爾呼訥河今厄
魯特不知其何往我兵微不敵兩尚書駐軍洮
瀨河今將至軍前聽調遣馬廸促其前進仍遣
勞章等偵噶爾丹至博爾濟河有馬濟者折卜

尊丹巴屬下人自厄魯特逃歸問之曰噶爾丹於五月初三日率兵渡烏爾扎河將襲昆都倫博碩克圖車臣汗及土謝圖汗其兵四營號四萬實不過三萬耳又將請兵於俄羅斯會攻喀爾喀阿爾尼以

聞

上曰似此則阿爾尼兵弱宜發科爾沁十旗預備之兵二千及禁軍每佐領護軍一名前往其令議政王

貝勒大臣議議曰兵宜速發應令理藩院遣官乘
驛前往科爾沁於前所調預備兵內選發二千
及台吉都統副都統各二員佐領驍騎校各八
員賫四月糧速赴阿爾尼軍前其統轄是軍者
惟

上特簡其八旗滿洲蒙古前鋒二百名每佐領護軍一
名每翼副都統一員前鋒叅領一員前鋒侍衛
署叅領一員前鋒校署侍衛二員每旗護軍叅

領一員護軍校署叅領七員其每翼所派副都
統一員亦惟

上特簡奏入得

旨科爾沁兵令土謝圖親王沙津率之左翼四旗居
遠難待令沙津王儘所有兵率之先往其四旗兵
隨後進發再令喀喇沁杜稜郡王扎錫旗分發兵
五百以扎錫率之兩翁牛特旗分發兵四百以杜
稜郡王畢力滾達賴率之兩巴林旗分發兵四百

以額駙阿喇卜灘率之俱赴阿爾尼軍前其禁軍
令副都統噶爾馬老滿色率之每翼漢軍兵一百
名帶前礮去滿洲蒙古漢軍各佐領出駱駝一頭
運糧

命內大臣索額圖諭俄羅斯使人

上既聞噶爾丹將借兵俄羅斯其使人吉里古里伊法
尼齊等時在京

諭內大臣索額圖曰爾曾至泥卜潮俄羅斯人識汝

汝可諭其使人言噶爾丹迫於內亂食盡無歸內
向行劫今乃揚言會汝國兵同侵喀爾喀喀爾喀
已歸順本朝倘誤信其言是負信誓而開兵端也
汝等可疾遣善馳者二人歸告泥卜潮頭目伊凡
遍諭俄羅斯之衆索額圖即日宣

諭令俄羅斯瓦什力齊克滿馳驛先往越三日遣吉
里古里伊法尼齊等歸

乙卯發官兵護送軍糧兵部奏言護糧官兵應

於八旗滿洲蒙古漢軍各派將領八員軍校八人每駝押兵一名出口外交蒙古遞運并以駱駝數目及起行日期上

聞

上命於大兵起行後四五日遣發取太僕寺駱駝十二以足一千二百之數

己未

命諸路兵速赴尚書阿爾尼軍阿爾尼等奏言郎中

馬迪報稱自烏爾扎河前踰一日程有厄魯特
列營狀乞

勅額黑訥阿南達兩軍速赴

臣

營并以礮來會

上諭曰八旗兵及礮即擇日啟行阿南達不必待額黑
訥即載礮以往其額黑訥及科爾沁巴林翁牛特
兵俱著星馳赴阿爾尼軍

六月壬戌

遣侍郎阿山古北口監發軍糧戶部侍郎賽必漢阿

山入奏軍行需兩月糧請以古北口倉粟支給
臣部遣司官二員往同霸昌道監發

上諭曰兵糧力能帶者給以兩月不能者減不則或鬻
之或棄之可慮也爾阿山前往監發

恩賜出征軍士戶部請預給出征官秋季俸兵四月
錢糧

上曰兵丁倉卒出行其各賜銀十兩修整器械仍給一
月錢糧

丁卯喀喇沁杜稜郡王扎錫奏請率所部從軍
先是

上諭扎錫率兵護餉不必隨征至是遣其子垂扎木素
奏曰

恩命令臣輸運軍糧所以體恤臣者甚至但臣雖不
材久蒙

恩養苟可自効敢不報稱臣先奏請備兵九百為國
先驅今願以臣所屬他布囊巴圖爾等率兵五

百護餉臣身率兵四百効力軍前

上許之

壬申

諭趣外藩兵及禁軍速發喇嘛商南多爾濟於五月
初四日至達漢德爾遇伊拉古克三及濟隆以
米餉之見厄魯特與俄羅斯使人同行厄魯特
自言已請兵二萬於俄羅斯矣俄羅斯使曰請
則有之允發則未也濟隆遂偕厄魯特使偵噶

爾丹沿烏爾扎河下流而往商南多爾濟偕伊
拉古克三沿克魯倫河下流行二十九日至河
南岸詢知噶爾丹前一日駐此糧盡殺馬為食
僅有兵萬餘商南多爾濟奏至

上諭議政王等曰頃聞厄魯特窮困沿克魯倫河下流
而來其遣人諭科爾沁巴林翁牛特兵速赴阿爾
尼所遣員外鐵圖往諭兩烏朱穆秦兩萬齊特兩
阿霸垓兩蘇牛特八旗除前所發外自王以下有

願効力者速赴阿爾尼所令鐵圖視其啟行令學士布顏圖催督全軍駐邊不時至軍前探聽我禁軍及火礮俱速令前往再發八旗前鋒二百名每佐領護軍二名預備以待噶爾丹來市易者有阿卜都喇額爾克寨桑等尚在歸化城理藩院其遣官往諭言噶爾丹且至爾等毋妄動行且有所差遣其集人畜以待

癸酉

命宗室公都統蘇努總領預備軍兵部遵

旨議發八旗滿洲蒙古前鋒二百名每佐領護軍二
名每翼派前鋒叅領一員前鋒侍衛署叅領一
員前鋒校署侍衛二員每旗委前鋒校二員派
護軍叅領二員護軍校署叅領六員每叅領委
護軍校三員其統領全軍大臣伏候

特簡

上命宗室公都統蘇努統領全軍鑲黃旗副都統覺羅

海都領左翼鑲紅旗副都統牛鈕領右翼即日又
令議政王貝勒大臣以克魯倫等處地名及程途
遠近詢問新來喀爾喀

戊寅

命增派禁軍及外藩兵時尚書阿爾尼等奏言臣等

聞厄魯特兵駐扎克魯倫之阿爾灘額墨爾地
方欲待

欽調大兵而行恐厄魯特兵進躡昆都倫博碩克圖

沿烏爾順河至喀爾喀河地方不得不急往防
護於六月初五日向波衣爾進發至博洛達卜
素地方又恐厄魯特兵前進先往據波衣爾於
是遣軍校諾爾布探視並無踪影遇一喀爾喀
自厄魯特所逃來執而訊之曰厄魯特兵是月
初六日已渡烏爾順河其兵號稱四萬近日至
烏爾扎河內見俄羅斯布敦諾顏使者率百許
人至噶爾丹所即急歸去矣不知其故又

皇上使臣及達賴喇嘛使人庫圖克圖等追及噶爾丹
與之議和不得見庫圖克圖等仍隨厄魯特而
行臣等聞昆都倫博碩克圖前來將至喀爾喀
河遣人諭令移其子女入喀倫而身率兵速至
臣所遣人猶未歸不知昆都倫博碩克圖所
在烏爾順河距喀爾喀河甚近喀爾喀河距喀
倫僅一日程臣軍若仍往波衣爾之地慮反出
其後以此竟赴波衣爾之南他奔他什海以禦

之若厄魯特兵或追襲昆都倫博碩克圖之後
或至邊汎近地臣等相機而行并遣人曉諭附
近邊汎科爾沁右翼烏朱穆秦諸旗各令防守
奏至

上諭曰噶爾丹踰枯倫波衣爾深入事關緊要理宜豫
備王沙津如未起行令率所調科爾沁兵往前年
吉爾他布駐防之地備之若沙津已起行著達爾
漢親王班第率兵往備之其敖漢柰曼貝勒額爾

德木圖公敖忒巴喇等旗兵之未調者令往備達爾腦兒前所派出每佐領禁兵二名作速遣行再於每佐領下應派護軍驍騎各五名預備以待其以阿爾尼奏速檄額黑訥知之議政王貝勒大臣其集議議曰應如

勅諭令理藩院遣官馳驛前往如沙津王已起行著於科爾沁十旗派兵一萬令達爾漢親王班第率赴前年駐防之地其管兵台吉都統以下官

員俱著班第酌選帶往其統領大臣伏候

特簡至教漢柰曼貝勒額爾德木圖貝子滾濟思扎
卜公敖忒巴喇五旗選發兵三千其管兵台吉
他布囊都統以下官員亦俱選擇派出其總率
是軍者於王貝勒貝子公內伏候

特簡理藩院速遣司官一員乘驛往派令至達爾腦
兒備之兵行俱攜三月糧又前所撥備兵前鋒
二百名每佐領護軍二名令來月初旬起行其

起行之日領兵大臣具奏請

旨現今備兵八旗前鋒四百每佐領各護軍三名驍
騎二名每叅領下各小校三名此所撥前鋒護
軍小校驍騎俱選擇派出每翼撥前鋒叅領一
員侍衛署叅領二員前鋒校署侍衛二員每旗
前鋒校各以四人署之護軍每旗撥叅領二員
護軍校署叅領六員每叅領護軍校各以五人
署之驍騎每旗撥實授叅領一員每叅領署叅

領一員散騎校一員驍騎校一員此所撥前鋒
叅領前鋒侍衛護軍叅領驍騎叅領委署夸蘭
大俱著各旗都統前鋒統領護軍統領引

見用其署叅領散騎校俱著各旗都統護軍統領會
同兵部派出是軍每翼撥都統一員副都統一
員該部奏請其總統前往者伏候

特簡又漢軍火器營兵亦應派發其官兵作何撥出
應令總管火器營都統請

旨奏入

上諭曰蒙古兵令攜兩月行糧其教漢柰曼科爾沁土
默特兵令貝勒額爾德木圖公教忒巴喇統之其
率科爾沁兵往吉爾他布駐防之地令內大臣蘇
爾達率前次將校乘驛前往其再發之軍每佐領
撥護軍五名驍騎三名府兵亦照此派發令都統
宗室喇克達彭冲護軍統領苗齊納楊代副都統
扎木素海瀾色黑康喀喇統之其副都統邁圖署

為前鋒統領前去再派出漢軍都統國舅佟國綱
都統諾邁凡派發火器營兵之事令彼請旨是役
也亦將諸王從征軍行日期交欽天監選擇令前
所撥兵輕裝於初旬速行其輜重令每翼留官校
押往餘如所議尋

命康親王傑淑恪慎郡王岳希從征

己卯都統額黑訥等奏報率兵往赴尚書阿爾
尼軍時侍衛阿南達副都統李林隆率察哈爾

兵并礮至伊黑噶扎爾之地與額黑訥軍遇聞
往會阿爾尼軍之

命阿南達先率兵北渡瀚海額黑訥等俟諸部兵喀
爾喀兵至選三千餘起行就水草善地養馬向
克魯倫河南往會阿爾尼軍額黑訥等具狀以

聞

科爾沁土謝圖親王沙津奏報噶爾丹情形沙
津奏言臣親率兵於是月十三日起行至敦達

見喀爾喀之衆倉惶奔來問之言濟農阿難大
賚我隣也聞為厄魯特所掠我懼故遷徙來奔
臣遣人偵之遇烏朱穆秦之人名墨爾根者言
十四日厄魯特自烏爾會河東北兩路而來兵
有二千許我台吉巴郎冲諾和等各率所屬百
許人甲而迎之厄魯特曰初以汝為喀爾喀及
至此乃知

中華皇帝兵也我等同一部落何甲而待我乎惟喀爾

喀我仇也當示我所在耳我主答曰喀爾喀已南徙不知所往厄魯特曰吾與汝友也吾不汝害請以刀戟指日立誓又曰伊拉古克三庫圖克圖在我所如或不信爾可隨我行遂挾我台吉及護衛額克濟兒而去次日又執我台吉妻子及部人六十餘我逃入深草中得奔而來恰遇所遣偵者因得至此又言率兵者非噶爾丹乃噶爾丹弟也

庚辰

命調盛京兵赴達爾漢親王班第軍班第奏言科爾沁台吉畢力滾達賴領兵至朱路木之地遇喀爾喀人自厄魯特逃來言厄魯特追之已至蒿爾河矣臣據報親率本旗每佐領披甲各十人台吉八員副都統一員叅領二員佐領六員於六月二十日起行往禦奏至

上諭曰前遣教漢柰曼諸部落兵備達爾腦兒者今不

必前赴令其追及蘇爾達與之同往如先於蘇爾
達則速赴科爾沁達爾漢親王軍前兵部選材能
司官四日馳至盛京發兵二三千令將軍副都統
領之速赴達爾漢親王班第軍前兵部承

旨遣郎中恩丕馳至

盛京將軍綽克托副都統博定隨發

盛京及開原興京東京遼陽廣寧錦州易州六城

兵共三千率之以行

辛巳定諸軍起行日期

上諭兵部曰噶爾丹追喀爾喀已進喀倫出征諸王出
喜峰口公蘇努等所領之軍隨朕行令諸王先朕
進發先檄知尚書阿爾尼等理藩院遣司官星馳
以往其令議政王貝勒大臣集議議曰諸王軍七
月初四日起行其從征之兵每翼遣副都統一
員

駕發日期初六日為宜奏入

諭曰前所發每佐領護軍二名初一日先發諸王率
每佐領驍騎一名於初四日繼發朕於初六日啟
行方農時邊內不必列營海都牛鈕才優從諸王
行扎木素康喀喇同蘇努行所發驍騎署叅領與
王偕行其中著有勞績人材雄健者詢該都統委
為夸蘭大其所遺叅領事散騎校署之

癸未

命增發官兵及火器烏朱穆秦額爾德尼貝勒博木

布奏言六月十四日厄魯特至烏爾會河東烏

闌之地臣屬人民多被劫掠臣遣護衛額克濟

爾往視見噶爾丹之弟韓都台吉送之至噶爾

丹所謂曰我攻我仇喀爾喀耳不敢犯中華界

聞尚書阿爾尼發兵而北何故折卜尊丹巴土

謝圖汗車臣汗皆在何地額克濟爾以不知對

奏至

上諭曰噶爾丹已至烏爾會河軍宜速出其軍中無火

器者與禁軍前所發兵及盛京兵俱應增發令議
政王貝勒大臣速行詳議議曰應於馬場催取馬
匹公蘇努之兵仍於初一日起行前所發之先
鋒護軍攜現馬於初二日發後派之前鋒護軍
驍騎於初三日俱發令各都統一員護軍統領
一員副都統一員率之至邊外水草寬行之地
駐候諸王軍於初四日起行直隸巡撫天津鎮
三屯營協標下火器兵再發一千併宣府鎮標

兵一千藤牌兵一千俱令宣府總兵官許盛率之與諸王同發京城兵每佐領應增派護軍二名每旗護軍叅領一員每叅領護軍校署叅領一員每翼副都統一員八旗火器營兵增發一千所增發護軍及火器營官兵俱護

駕而行至

盛京兵增發二千令將軍若副都統統之紀林烏喇兵二千將軍親率之俱令赴科爾沁達爾漢

親王軍前與前所發

盛京兵會遣兵部官乘驛往再取巡捕三營馬八百給與軍士

京城大兵陸續遣發

皇上親統大軍相繼而行理藩院檄諭四十九旗令各備兵分汛哨探并檄阿爾尼額黑訥阿南達等軍知之奏入

上諭曰後所發護軍各二名令都統阿錫坦副都統納

秦希禪率之俟朕啟行後續發至副都統噶爾馬
等所領兵并礮令內大臣阿密達往統之不時偵
探奏報以候朕至總兵官許盛既帶操練藤牌軍
一千名其標兵可選六百出張家口令前鋒叅領
索柱巴圖魯引之由岱陰達巴漢之路往赴阿密
達軍前其直隸巡撫天津鎮標兵一千令三屯營
副將師帝賓率之隨諸王而行俱攜兩月糧巡捕
營馬八百疋給火器營兵比聞驛站廢弛令直隸

巡撫于成龍整理其綠旗候選軍官武進士舉人及林興珠等革職官員有愿効力者令與火器營兵同行如有勞績酌量擢用其曉諭之都統彭冲護軍統領楊代副都統色黑於初二日起行都統喇克達護軍統領苗齊納副都統海瀾於初三日起行未幾許盛已行復令回宣府聽調

甲申遣使賫

勅諭噶爾丹

上將出軍先遣理藩院員外郎阿爾必特祜達賴賚

勅書往諭噶爾丹

命之曰爾至噶爾丹所語之曰汝昔職貢往來未嘗失禮今乃闌入邊汎掠我屬國是何意耶皇上特遣使者詰汝其竭誠以對又念汝向來恭順令塞外諸部且未興兵擊汝尚可改圖我使臣久留汝地而不令歸何也彼如遣喇嘛等歸則攜之而來不遣則已務婉言相慰羈縻其前行勿怒而激之

也如彼欲辨釋則攜彼要人來面奏如問汝中國發兵乎則曰聞汝無故闌入發兵以備邊也如彼問聖駕及諸王來則曰不得而知如彼不遣使來則汝等一人星馳來奏一人率筆帖式馳赴諸軍密諭之曰上遣我等羈遲其前行大兵不日至矣其各集兵增備姑勿與戰以待而每夜輒張兩翼嚴巡儆防其夜襲如噶爾丹見勅諭而退兵則止之令勿退其或不止則令諸軍疾發擊之如或奔

潰務必窮追

賜噶爾丹勅曰朕統御宇內懷柔萬邦惟願率土生
民咸得其所相與協和無分中外夫兵兇器戰危
事互相仇怨無有已時非計也故遣尚書阿爾尼
散秩大臣吳巴什扎薩克大喇嘛阿齊圖綽爾濟
一等侍衛阿南達傳諭令罷兵息戰爾回奏云聖
主施仁撫育令共相協和以享康泰我亦與焉伏
願指示安樂之策聞聖上將盡驅出喀爾喀之人

不勝懼怯不敢以殺我弟多爾濟扎卜為憾所奏甚明今乃聞爾復興兵伐喀爾喀故遣尚書阿爾尼防境內之不靖者今烏朱穆秦遣使至爾所言中華與我一道同軌我不敢犯界內地方而又闌入邊汛掠烏朱穆秦人畜是背前言而隳舊好也且我前所遣伊拉古克三庫圖克圖等至今不歸爾誠何意耶今遣員外郎阿爾必特祜達賴賚勅諭爾爾尚可以改圖爾既入邊我諸部王及貝

勒台吉行且興兵擊爾故亦遣來使止之卹爾至
矣其速給還所掠歸我使人爾其明白回奏是日
即以

遣使諭噶爾丹事檄知諸軍

丁亥

授尚書阿爾尼等進兵機宜時噶爾丹沿喀爾喀河
而進追及昆都倫博碩克圖昆都倫不能禦僅
以身免所有牛羊盡為所擄阿爾尼聞噶爾丹

駐兵索約爾濟河連夜率兵往襲之至則噶爾丹已從濟達齊罕之東向烏爾會河去矣喀爾喀偵者報稱厄魯特兵二萬餘往追車臣汗土謝圖汗挾使臣伊拉古克三商南多爾濟而行

問

盛京與歸化城所在阿爾尼等率軍前進遣人檄諸軍速發具疏以

聞

上命阿爾尼等仍躡厄魯特後偵其所至奏報額黑訥
等軍到且勿與戰俟達爾漢親王班第兵盛京烏
喇滿洲兵齊集同夾擊之如噶爾丹潰敗令阿爾
尼等引兵窮追便宜行事檄諸軍量馬力疾行齊
會形勝之地以俟禁軍

戊子

命康親王傑淑恪慎郡王岳希率禁軍駐歸化城西
安將軍尼雅漢等率西安兵駐寧夏

上諭議政王等曰康親王恪慎郡王副都統海都牛鈕
率前所發驍騎每佐領各一名於初二日起行出
張家口屯歸化城如大同兵可用聽王等隨宜調
遣其厄魯特貿易人馬匹託言乘用盡收之直隸
巡撫率兵一千駐遵化西安將軍尼雅漢副都統
巴賽柏天郁率滿洲兵二千漢軍兵一千屯寧夏
其寧夏綠旗兵亦令預備

尚書阿爾尼等奏報與厄魯特戰於烏爾會河

地方厄魯特兵二萬餘掠烏朱穆秦男女牲畜
輜重徐行遡水上流遊牧阿爾尼偵之分兵二
隊乘夜往襲二十一日昧爽於烏爾會河地方
及其營令所選蒙古勇士二百餘攻之令喀爾
喀兵五百驅其所掠未及戰諸部落及喀爾喀
兵爭取其子女牲畜陣動不能止遂退厄魯特
分兩翼陣而立我軍次隊繼進厄魯特發烏鎗
軍退前隊兵及喀爾喀兵復進喀爾喀畏其烏

鎗先却諸部落兵力薄亦退厄魯特增兵從山
上繞出我左右我軍不能進遂斂兵歸是役也
厄魯特多火器而我火器營未至是以不得前
進乃駐軍烏朱穆秦之鄂爾折伊圖以俟諸軍
阿爾尼等具狀以

聞

上以示議政王貝勒大臣尋兵部議阿爾尼吉爾他布
等違

命輕戰以致敗績俱應革職同往官員亦俱革職得旨阿爾尼吉爾他布革去議政降四級調用吉爾他布仍留佐領餘如所議

遣使申諭噶爾丹時噶爾丹歸我使商南多爾濟以其情陳奏

上起滿丕為理藩院郎中鄂齊爾為員外郎往諭噶爾丹

命之曰爾等往語噶爾丹據商南多爾濟來奏言尚

書阿爾尼等與汝交戰阿爾尼不請旨而即擊汝
非本朝意也阿爾尼本奉命率諸部兵防守地方
汝闌入邊汎肆行劫掠職寄所關不得不戰假有
他部入汝界汝防邊者能默默已乎皇上聞汝在
邊恐諸部擊汝前已遣使諭止之今聞交戰故又
遣我等來諭噶爾丹若問曰商南多爾濟議驅逐
土謝圖汗折卜尊丹巴庫圖克圖此言已上聞否
則答曰不知也若問中國有兵來乎則告之曰來

如又問何人率之而來則曰我來急不知也再語之曰商南多爾濟奏汝言與中華一道同軌我但索土謝圖汗折卜尊丹巴而已至邊境之內不敢纖芥犯方議遣使而我尚書阿爾尼等遽加以兵甚為過當商南多爾濟亦以阿爾尼之舉為非其以此曉諭之倘阿爾必特祜等未到汝等攜之偕行

己丑調察哈爾兵防護馬場

上以厄魯特兵入喀倫馬場急宜防護乃

遣副都統馬什調察哈爾兵往駐形勝之地以備之

設邊外驛站喀爾喀扎薩克台吉額爾克阿海

等率千餘人作亂縛驛吏劫馬匹弓矢而去學

士布顏圖以